

Parare Domino Plebem Perfectam

A lokisetse Morena Sechaba se phethehileng (Luka 1,17)

# Moeletsi oa Basotho

www.moeletsoabasotho.co.ls

World Vision e thakela baqolotsi



2

Ba re 'muso o bule

5



Sepolesa se hlapa matsoho

8



## LIKHOHLANO MABAPI LE SEHLOPHA SA BOSUPA



8

www.moeletsoabasotho.co.ls



KETEKELO EA LILEMO TSE MAKHOLO A MABELI SECHABA SA BASOTHO SE THEILOE

+266 28 350 466/  
 +266 6260 0983 WhatsApp  
 newsroom@moeletsoabasotho.co.ls  
 #PARARE DOMINO PLEBEM PERFECTAM



# MOELETSI

## Ha ho kopano e ke'ng?

Litichere tsa Lihlopha tsa Borobeli li bile le ngongoreho mabapi le baithuti ba tsoang Sehlopheng sa Bosupa, 'me lingongoreho tsa tsona li kenyetsa tsena; lenane-thuto le lecha le etsang hore baithuti ba fetisoe lihlopheng leha ba sa pasa ebe joale ha ba fihla lihlopheng tse mahareng ha ba tsebe le ho ngola le lebitso la bona feela. Lekala la Thuto le Koetliso le re le arabela selo sena ka hore baithuti ha ba qeta ho ngola lihlahlobo tsa bona tsa mapomelo ba se koale, litichere li tsoelepele ho ba ruta e le hore li tsebe ho bona khahello 'me li lokise.

Taba ena ho shebahala e sa thuse hakaalo kaha litichere tsa Likolo tsa Mathomo li tletleba ka hore lekala ha lea kopana le bohle ba amehang ho tshohla taba ena hantle. Ka hona li tsoha hore baithuti ba tla boela ba ikoalisa likolo hape hobane ha ho na meralo e hlakileng ea tšebetso, 'me sena se etsa hore baithuti ba lelere. Letsoalo le leng la bona ke hore baithuti bana ba bonahalang ba se ba kene litabeng tsa thobalano lilemong tse tlaase, e tl'o ba bakhachane hobane kelello e sa sebetsang e oela molekong.

Potso ke hore na ke maemong afe lekala le ka etsang qeto ntle le ho kopana le mafapha ohle a amehang? Ho bohlokoa haholo ho utloa maikutlo a motho ea tšebetsong hobane ke eena ea tsebang likatleho le liqholotso tsa letsatsi le letsatsi. Lipuisano le tšebeliso 'moho li'a hloka hlahla lipakeng tsa mohiri le mosebetsi, e se mohiri a ntše taolo feela hobane a re o na le matla a ho etsa joalo.

Leha ho le joalo, lekala le tsoanang kamor'a ho etsa liphuputso le thehile sethala moo baithuto ba tla tseba ho ntša mabina-bina a lipelo tsa bona mahareng a bona. Baithuti ba tla ba le monyetla oa ho buisana ka liqholotso tse ba tobileng haholo tse tsoang malapeng, kaha e le tsona tse nang le khahlamelo e kholo bophelong ba bona. Ha likamano lipakeng tsa litichere le batsoali li le ntle, ho tla ba bobebe haholo ho kopana e le ho buisana ka liqholotso tsena, ebe tharollo e ba teng. Ho ntse ho kenyelletsoa baithuti liqetong tse teng, hobane taba ea hore ngoana o nkeloa liqeto ke batho ba baholo e felile khale.

Batho ba nang le bokooa ha ba hiroe ka tsela e khotsofatsang hobane ha ba e-s'o amoheloe joaloka motho e mong le e mong, ka hona litokelo tsa bona li'a hatikeloa. Ba kopile hore ba kenyelletsoe hohle meralong haholo moo ho iketsetsoang e le hore ba tlohele ho fuoa liphallelo hobane ba tseba ho iketsetsa. Ho na le ntho e bonahalang e hana ho tsoa bathong ea hore bokooa ha se bokuli ho hang, ebile boholo ba batho ba joalo ba tseba ho etsa mesebetsi ea letsatsi le letsatsi. Se ba sitisang boholo ke ho se kenyelletsoe meralong e meng, joaloka litsela.

Banka ea Standard Lesotho e entse mesebetsi o motle oa ho thusa Lehae la St. Cecilia, Ha Buasono ka likhoho tsa mahe. Khato ena e ntle haholo hobane bana ba tl'o ithuta ho itsoarela ka matsoho e le hore ha ba tlohele moo ba tsebe ho ithehela mesebetsi. Mookameli oa Lehae lena o bontšitse hore thuso ena ke eona eo a e hlokanang, hobane temo ke e 'ngoe ea mesebetsi e kaholimo ho thusa ho hlola bofuma le tlla tse tjametseng Sechaba sa Thesele.

# World Vision e thakela baqolotsi



## Nthabeleng Seithleko

**W**orld Vision Lesotho e tšoare tse baphatlalatsi ba litaba thupelo ea matsatsi a mabeli, holima litaba tsa tšebeliso e mpe ea bana, thekisetano ea batho le litokelo tsa mantlha tsa botho, e le ho matlafatsa botlalehi ba litaba bo sireletsang kholo e nepahetseng ea bana. Litaba tsena li bile Berea ka la 22 ho isa 24 Mphalane monongoaha.

World Vision Lesotho ke o mong oa mekhatlo e sebetanang le litaba tsa poloheho le kholo e nepahetseng ea bana, o bile o tsetse ka matla ntlafalong ea bophatlalatsi kaha ba atleha ho fetisetsa thuto sechabeng habonolo.

Motlatsi oa Mookameli oa World Vison Lesotho 'Maseeisa Ntlama, o hlalositse ha ba rata ho tsoarana ka matsoho le mafapha ohle a amehang litabeng tsa bana 'moho le baphatlalatsi ho thusa ho etsa matšolo a tlhokomeliso hore sechaba sa Basotho se utloisise le ho tseba ka tšireletso ea bana.

O re ho bohlokoa hore ngoana a phele tikolohong e bolekehileng, ka hona ba tšoere ka thata ho bona hore baphatlalatsi e ba karolo ea ho tlaheha litaba tsohle ka nepo le ho sireletsa bana molemong oa kholo ea sechaba se holang se itseba.

'Matiisetso Mosala Leb-itsong la Misa Lesotho o lebohile World Vision ka ho ela hloko baphatlalatsi le ho ba thakela ka malebela a ba thusang ho tlaheha ka nepo le ho ntlafatsa litsebo tsa bona. A re lithupelo tsa mofuta ona ke boithlahlobo hore na baphatlalatsi ba ntse ba tšoere joang le ho lokisa moo e bang liphoso tšebetsong ea bona.

A re ho hlahlleloa ka malebela ho matlafatsa ho pharalatsa litaba tsohle tseo ba li tlahehang ka tsebo. O itse ba tla tsebe ho fetoha letsoai kahar'a sechaba ho thusa Basotho ho utloisisa litaba tsohle tsa poloheho ea bana.

E mong oa baphatlalatsi thupelong ena Liketso Mokhothu, o itse thupelo ena e mo thusitse hobane o tseba

ho hlalohanya tsela eo ba lokelang ho atamela batho ba nang le bokooa ka eona kaha ba e-na le litokelo joalo ka mang le mang.

A tsoelapele hore o ithut-ile hore batsoali ba lokela ho fa bana ba bona litokelo tse ba lokelang ba se ke ba ba imetse ka mesebetsi eo e seng ea bona linakong tseo e seng tsa bona. A re litabeng tsa thekisetano ea batho o hlokometse hore ho na le phapano kaha motho a rekisoa ke motho ea hau-fi le eena ka tsela ea ho etsa chelete, kapa a ka rekisoa ho sebelisoa hampe litabeng tsa thobalano le ho fetoha lekhoba.

O re litaba tsena li na le mekhatlo e ka thusang litabeng tse amanang le bana ba ka fumanoang ba hlekefelitsoe. O ipilelitse ho Basotho ho hlokomela bana haholo bacha le batho ba nang le bokooa. O bontšitse takatso ea hae e le ha ho ka etsoa melao e sireletsang litokelo tsa bana e be e etsetsoe tšalo morao le hore naha e sebelisoa litumellano tsa machaba tseo e li tekenelang.



Contacts: +266 28350 466 / 6260 0983 (Whats app)  
Email: moeletsioabasotho@gmail.com

**MOELETSI oa BASOTHO**  
A LOKIBETSE MOENA SECHABA SE PHETHELENG (LUKE 1:17)

### Editorial

Lesoetsa Rakubutu (Editor)  
(+266) 58490670 / 62031949  
editor@moeletsioabasotho.co.ls

Lehlohonolo Mohale (Sub-editor)  
(+266) 58 771 507 / 62 771 507  
subeditor@moeletsioabasotho.co.ls

### Advertising

Thabo Lesaana  
(+266) 28 350 466/ sales@moeletsioabasotho.co.ls

### Newsroom

Nthabeleng Seithleko 57 665 038/ 68 216 721  
nthabeleng.seithleko@moeletsioabasotho.co.ls

Tšelisio Thakholi (Sports) 58 540 853/ 63 480 404  
tseliso.thakholi@moeletsioabasotho.co.ls

newsroom@moeletsioabasotho.co.ls

### Production Desk

'Mateele Liqa, Sr. Canicia Nthunya



# HO CHECHA HOA RAMO HASE HO BALEHA

## Powering down to power up

Litonnoro tsa Morero oa Metsi a Lihlaba tsa Lesotho le Setsi sa Phehlo ea Motlakase sa 'Muela, li tla koaloa **HO TLOHA KA KHOELI EA MPHALANE 2024 HOISA KHOELING EA TLHAKUBELE 2025**, ka lebaka la litokiso. Nakong ena, phetiso ea metsi ho tloha Lesotho ho ea Afrika Boroa e tla emisa, 'me le Setsi sa Phehlo ea Motlakase se tla sitoa ho fehla motlakase.



# RE TŠEHETSA BACHA

## Tšelisothakholi

**S**ekhahla sa tlhokahalo ea mesebetsi kahare ho bacha lefatše ka bophara se bonahala se phahame haholo, 'me bacha ba Lesotho ha se mekhelo. Ka lebaka la maemo ana bongata ba bacha ba ithukhubelitse khoebong ea ho betla lejoe, mane Lekokoaneng tikolohong ea TY. Ebe na khoebo ee haele moo ba qothisana lehlokoa le melata na e tla fela e fetole bophelo ba bona. Bacha ba babeli ba ikopantse ba thehile khoebo e etsang lintho tse fapakaneng ka lejoe tse kang majoe a ahang matlo, a mabitla ka mefuta le ho etsa mekhabiso e fapakaneng ka lejoe. Bona ke Teboho Tšekelo le Thato Mokhemisi ba Ha 'Matjotjo, TY. Ba re qoqela ka tšebetso ea bona.

### Qaleho ea khoebo

Ho tloha re qalile khoebo ena ka selemo sa 2019 re ile ra ithuta hore sekhahla sa theko ha se eme nqa e le 'ngoe, hoba u tla fumana hore mafelo a khoeli batho ba reka majoe a ahang ka bongata ho feta har'a khoeli. Re qalile re rekisa majoe a ahang feela, ra bona re hlile re atleha ho etsa chelete e khotsofatsang haele mafelo a khoeli. Haele mahareng a khoeli bohola ba majoe a rekoang ke a mabitla, empa h'a rekoe ka sekhahla se sehlo ho latela ka moo re neng re ka lebella ka teng.

### Sebaka sa tšebetso

Sebaka sa rona sa tšebetso joalokaha ke se ke boletse se Lekokoaneng, 'me se hole haholo le

bareki. Re se re thusoa feela ke ho 'na re chenchana ho ea toropong re nkile karoloana e 'ngoe ea lihlahisoa tsa rona ho ea li bapatsa e le ho hohela bareki. Re boetse re sebelisa marang-rang ho bapatsa lihlahisoa tsa rona. Re leboha le tšebetso ea Koranta ka monyetla oo e

Re le bacha re iphelisa ka khoebo ena ea lejoe, re hlolisana le melata ka lihlahisoa tsa habo rona, ha ba lokela hore ebe ba tla ka lifeme tse kholo re bona ba qala ka tse nyenyane tse lekanang le tsa rona. Ba rekisetsa batho majoe ka bonngoe ha ba lokela ho a rekisetsa likampani tse

Bothata bo bong ba rona ke ho hloka likoloi tse nkhang thepa ho e isa ho bareki ha ba qeta ho reka. Taba ena e qetella e etsa hore bareki ba reke ho melata hoba bona ba kenya likopo ba romelloa thepa eo ba e hlokang. Athe rona moreki o tlameha a itlile ho tla itatela thepa.

ta haholo, hoo ka linako tseling ba bang ba khutlang ba sa rekisa letho. Taba e 'ngoe ke khaello ea lisebelisoa tsa ho betla majoe. Re kopa 'muso ho re sheba ka leihlo la mohau. Re ke re fumane mechini e meholo e tla re thusa ho hlahisa ka tsela e kho-loanyane.

### Toro ea rona

Mocha e mong le e mong h'a qala khoebo o ba le toro ea seo a batlang ho bona khoebo ea hae e le sona. Re rata ho bona re holile ho feta mona. Re se re e-na le likoloi tse kholo tse tla isa lihlahisoa tsa rona tsa lejoe kantle le kahare ho naha. Re batla le ho eketsa basebetsi e le ho fokotsa tlhokahalo ea mesebetsi kahare ho bacha.

### Keletso ho bacha

Bacha nako e fihlile ea hore re eme ka maoto re itšoarele ka matsoho. Re hlahise boqapi ba likhoebo tse ncha metseng moo re phelang teng. Ha ho hloka-hale hore re ka tla bokellana metseng ea litoropo re re re batla mesebetsi. Ha re itlthahisetseng mesebetsi ka litsebo tseo re nang le tsona. Kea tseba bacha ke



re fileng ona.

### Mefuta ea majoe

Re ikopantse ka litsebo tse fapakaneng tsa ho betla lejoe, 'me ka litsebo tseo re nang le tsona re etsa majoe a matlo, a mabitla le mekhabiso. Batho ba ka re mema malapeng ho ea khabisa matlo a bona. Re etsa le litšoantšo ka majoe. Re na le litsebo tse khethehileng tsa botaki tseo re li etseng sekolong. Re boetse re liahi re ahe-la batho matlo ka lejoe ka lithoko tse tlaase haholo. Re tseba le ho tsoaka pente bakeng sa ho khabisa majoe le ho a penta molemong oa hore a tle a tsebe ho nka nako e telele a ntse a shebahala hantle.

### Liqholotso

kholo kapa ho rekisa kantle ho naha hoba bona ba na le liphaka tse lekaneng.

Bothata bo bong ke hore re le bacha re se re kene khoebong ena re le banga-



Listen To Us Here

Mafeteng  
Mohale's Hoek  
Qach's Nek  
Quthing

Maseru  
Berea  
Leribe

Mokhotlong  
Thaba Tseka  
Butha Buthe

[www.bokamoso974.co.za](http://www.bokamoso974.co.za)

batho ba bohlale ba nang le lineo tsa tlhaho ha ba bang bona ba ile sekolong ho ea ichorisa. Ha re itlthahisetseng mesebetsi e mecha. Re sebeletse hore likhoebo tseo re seng re ntse re e-na le tsona li hole re se ke ra fetoha boitšokuli bophelo bohle ba rona.



# Bangoli ba Molao b'a ichorisa



**Tseliso Thakholi**

**E**a tsoereng molepo e le Mongoli e Moholo oa 'Muso, Monghali Sekati Makhele o re sepheo sa Lenane la Tšehetso bakeng sa Tokiso le Matlafatso ea Puso Lesotho ke ho khotlaetsa puso ea molao, e ntle, litokelo tsa botho le teka-tekano Naheng ea Lesotho. O buile tsena h'a bula ka molao thupelong ea bangoli ba molao e neng e tsoaretsoe Lancers Inn, Maseru ka la 21 Mphalane 2024.

A bontša hore lenane lena le tllil'o thusa ho akofisa toka ho batho bohle le ho fana

ka tšehetso bakeng sa tokiso le ho matlafatsa puso ea Lesotho. A supa hore koetliso ena ea bangoli ba molao ke mosebetsi o etsoang e le ho fihlela sephetho tlas'a sepheo se khethehileng sa ho ntlafatsa katleho le boleng ba phano ea litšebeliso tsa toka.

O itse le kopanetse litšebeliso tsa boelets'i ho bona, bakeng sa lithupelo mabapi le ho rala molao. A re mosebetsi oa mantlha oa Ofisi ea Boelets'i ba Paramente ke ho lokisa setšoantšo sa molao-theo o tla hlahisoa paramenteng. "Ofisi e ikemiselitse ho hlahisa melao ea boleng bo holimo le ho netefatsa hore e'a fihleleha ho sechaba. Koetliso ena e fihlile ka nako e nepahetseng kaha e na le

letoto la lithophiso tsa molao tse haelloang ke lithupelo." A rialo.

Lebitsong la Mekhatlo

o itse mokhatlo oa habo o ikemiselitse ho matlafatsa toka, molao oa tsamaiso, litokelo tsa botho le puso

matlafatsa boikarabello le toka hammoho le phano ea litšebeliso, ho tsepamisitsoe ho phumantšo ea toka



ea Linaha tsa Europe, Mofumahali Ediki Baneqiri ea sechaba ka sechaba. A re sepheo sa Lenane ke ho

le tataiso ka litaba tsa molao.

Lebitsong la Mongoli e Moholo oa Lekala la Toka le Molao, Mofumahali Thato Masiloane o boletse hore molao ke motheo oa botsitso ba naha ka 'ngoe. A re lenane lena le tsepamisitsoe ntlafatsong ea puso ea molao Lesotho. Mofumahali 'Mabokang Sekokotoana eo e leng Mongoli oa Molao o boletse hore thupelo ena e tllil'o matlafatsa liofisiri hore li etse melao e tla tsoela sechaba molemo e boemong ba hore e fetisoe ke paramente.



## Ba re 'muso o bule

**Nthabeleng Seitlheko**

**K**omiti e Kholo ea Bacha ba Lekhotla la Puso ea Sechaba(DC), e re 'muso o lokela ho bula mamati ka ho kenya tšebetsong Lekhotla la Bacha leo morero oa lona e leng ho loanela litaba tsa bacha ho bona hore li'a sebetsoa kahar'a naha. Litaba tsena li boletsoe ke Molula-Setulo oa komiti Pheello Sehlabakha puisanong le Koranta ka la 23 Mphalane monongoha.

O re tlhokahalo ea mesebetsi e bonahala e totile haholo ho bacha ba Lesotho empa ba bona 'muso o sa etse matsapa a hore na o hlahisa mesebetsi joang. O re lipalo-palo li supa ha bacha ba etsa 40% ea sechaba sa Basotho, 'me ba hloka mesebetsi ba tlalehoa e le 25% ho isa 30%. A re taba ena ka bo-eona ke

tlokotsi ho naha ka kakaretso, "ka hona re ipiletsa ho 'muso ho phatlalatsa tlhokahalo ea mesebetsi e le qomatsi 'me o behe tlhokahalo ea mesebetsi ka pelepele meralong ea ona." A rialo.

O itse ba boetse ba seboko ka likhiro tsa seoso-oeso tse bonahalang li jele setsi ka hare ho puso, kaha batho ba hiroa ka likamano tsa malapa le mebalala ea lipolotiki. O re sena se baka khalefo bacheng e qetellang e ba lahlisa tšepo litabeng tsa lipolotiki le ho khetha. Ka ntle ho moo, o re taba ena e ka boela ea baka ntoea ea bana ba thari kaha mocha e mong a ka tsohela e mong matla.

Ho ea ka polelo e ntšitsoeng ke Komiti e Kholo ea Bacha ba DC, ba re ba bona 'muso o hira basali ba maparamente o tima bacha monyetla, kaha ba bone ha mosali oa mokhethoa oa Thaba-Moea le Rothe ba fuoa mesebetsi e hlamatse-

hang ea ho ea emela Lesotho machabeng, 'me taba eo ke meharo hobane ho ea ka kutloisiso ea bona moruo o lokela o arolelanoe eseng o bokelloe lelapeng le le leng, ka hona ho emisoe ketso ena hang hang.

Ba re ba boetse ba etse hloko seboko se hlahang Ofising ea Tona-Kholo moo ho utloahalang basebetsi ba lesupa-tsela leo e meng ea merero ea lona e leng ho felisa tlala eo Tona-Kholo a e phatlalaltseng e le qomatsi ba e-šo lefshoe meputso ea bona. Ba re hona hoa soabisa kaha ho etsahala hona Ofising ea Tona-Kholo ka kotloloho eo eleng eena a apesitsoeng matla ohle a kaloso ea phethahatso ea maano a puso.

Ba tsoetsepele ka ho re ho na le koluo Lekaleng la tsa Lehae ea tlhokahalo ea litokomane, e bakang tšitiso bacheng ba Lesotho ba lokelang ho fata metsuntsunyane kantle ho naha, hape e ba sitisa ho

phetha mabaka a letsatsi le letsatsi.

Ba itse ba hlokometse hore ho na le tlhokahalo ea lipolomiti 'me ho bonahala Basotho ba ntse ba phalalisoa ka bongata Naheng ea Afrika Boroa, ka hona ba ipiletsa ho Tona-Kholo Samuel Matekane ho lokolla, Mohlomphehi Lebona Lephema ea bonahalang a imetsoe ke mesebetsi lekaleng le joalo.

"Muso ona re bona o iphanyelitse ho kenya tšetsong melao e melemong ea sechaba joalo ka temana ea mashome a mararo a metso e mene (section 34) oa ngoliso ea likhoebo oa 2020 e sireletsang likhoebo tsa Basotho khahlanong le melata, kaha le paramente e ne e se e laetse letona hore molao oo o kene tsebetsoeng."

Ba re se seng sa molao oo 'muso o sa o kenyeng tšebetsong ke setšoantšo sa molao se laolang lekhetho ka hona bona e le komiti ea bacha b'a tseba ho na le setšoantšo se reretsoeng ho tla nka lekhetho la litae-manane ka hona ba masoabi

hore joale setšoantšo seo esale se nyamela kapa se hatoa ke babusi ba joale holimo 'me boipotso ba bona ke hore na ke 'muso o joang o nyametsang setšoantšo sa molao seo morero oa sona e leng ho tla nyolla moruo oa naha e le ho bokella chelete e tla hlahisetsa bacha mesebetsi e fapaneng. "Re kopa Lekala la Lichelete le la Merafo le ke le hlahise setšoantšo seo sa molao, ho seng joalo re tla kopana le Komiti ea Paramente ea Lihloliloeng hore e re thuse."

Ba itse ba makalletse ho utloa Letona la Merafo le re 'muso ha o na moralo oa hore na o tllil'o etsa joang kaha ho bonahala thekiso ea litaemane e ntse e lahlehela ke boleng kaha ho s'o e-na le linaha tse iketsetsang taemane. "Litaba tsa mohlomphehi letona li supa 'muso oa rona e le o se nang boiphihlelo le boinahano bo tebileng litabeng tsa puso."

Ha ba phethela ba re ke lentsoe la bacha ba Lesotho le la bohle ba sitoang ho ipuella, ba loanela litokelo tsa



# Toantšo ea HIV le Lefuba

ho le joalo a re Lesotho le maemong a khothatsang kaha le potlakisa boiteko ba

## Nthabeleng Seitlheko

**N**aha ea Lesotho e suptjoa e ntse e itšetlehile le-hetleng la bafani ho loantša litaba tsa tšoaetso ea HIV/AIDS le Lefuba, ka hona ke nako ea hore e ikemele khahlanong le boemo bona ho ea ka leano la naha la toantšo ea HIV/AIDS le Lefuba la selemo sa 2024. Litaba tsena li hlahelletse 'mokeng oa makala a amehang litabeng tsa toantšo ea mafu ana, ka la 21 Mphalane monongoaha.

Molula-Setulo oa Mokhatlo oa UNAIDS Lebohang Mothae, o hlalositse hore ke nako e nepahetseng hore mafapha ohle a tšohle litaba tsena ka botebo ho loanela hore Naha ea Lesotho e ikemele khahlanong le boemo bona kaha ho hlokomelehile hore bafani ba ntse ba qepha. O re Lesotho le fihletse lipheho tsa Machaba litabeng tsa toantšo ea kokoana-hloko ea HIV, ka hoo e lokela ho sebetsa ka thata ho loantša litšoaetso tse ncha.

H'a tsoelapele o itse 'moka ona o ba thusa ho itlhlahloba le ho bopa meralo e eang pele hore naha e tsebe ho hlola maemo ana. A re nakong ena eo re leng ho eona lithuso li ntse li qepha ka lebaka leo mafapha ohle a lokela ho kopana 'moho ho bona hore moralo ona o sebetsa joang.

Mookameli oa UNAIDS Lesotho Pepukai Chikukwa, o bontšitse hore lipheho tsa moshoelella li supa hore ka selemo sa 2030 tšoaetso ea HIV/AIDS e be e felile, 'me lipheho tsa UNAIDS tsa ho loantša lefu lena tsa 95,95,95 tsa be li fihletsoe ka selemo sa 2025 ho isa selemong sa 2030. A re ha joale batho ba tlokotsing ba ntse ba kopana le phepetso ea ho sitoa ho fumana litšebeliso tsa bophelo.

O re tse ling tsa liqholotso ke hore ho fihlile tlhokomelong ea bona hore lefatšeng ka kakaretso le kahar'a naha litaba tsa tšoaetso ea HIV/AIDS li ntse li sebetsa ho nyefofoa, tse ling ke ho mang ke ho nyoloha ha litheko tsa lijo, bofuma le



litaba tsa phetoho ea boemo ba leholimo. A re Lesotho ke 'ngoe ea linaha tse fihletseng litaba tsa lipheho tsa lefatše tsa 95,95,95 kahar'a linaha tse fokolang, ka hoo ba hloka boitlamo ba lipolotiki ho hlola Naha ea Lesotho,

A re 270,000 ea sechaba se phelang le tšoaetso ea HIV/AIDS sekahla sa bona sa tšoaetso se tlase, 'me batho ba tla natefelo ke litaba tsa bophelo bo bottle. A etsa boipiletso ba hore litšoaetso tse ncha tse hlahang selemo le selemo tse 4,800 li se iphete ho hang 'me tsohle li behoe taolong.

O itse Naha ea Lesotho e ntse e tsoelapele ho sebetsana le litaba tsa tšoaetso ea HIV/AIDS, empa le tobane le mathata a maholo taolong ea lefu la Lefuba

kaha e le e 'ngoe ea linaha tse 30 tse nang le moralo

o phahameng ka ho fetisisa lefatšeng ka bophara. Leha

ho boloka liphetoho litabeng tsa toantšo ea lefu lena.



## Seek first our contentment

**Teboho Matjeka**  
63574502/58911803

**H**appiness and contentment should always be our priority when we do anything. We are never meant to survive but to enjoy our short time on earth. Our time is very limited on earth, hence, a

need to invest in a creation of happy memories while at it. We can achieve all these through proper decision making, choosing our happiness above everything and choosing ourselves. We often make a mistake of choosing others over ourselves, we seek to belong by compromising ourselves and our standards so much

that in our time of reflection and introspection we are depressed. Our depression comes from the battle between our minds and our actions, most of the time our actions don't necessarily reflect our intentions and the reality we want to achieve. We comprise so much of ourselves that we lose our identity, nothing without identity is recognisable and can never have happiness.



Let's choose our own happiness above everything, if at all anything costs our happiness it's not worth it.



# Letheke-theke khirong ea batho ba nang le bokooa-Tšilonyana

## Nthabeleng Seitlheko

Muso oa Lesotho o lokelela ho kenya tšebetsong molao o sireletsang batho ba nang le bokooa le ho ema khahlanong le batho ba talimang bao e le batho ba se nang thuso kapa ba lula ba ba nono-soa liphallelo kaha taba eo e nyenyefatsa boleng le boiphihlelo ba bona. Lita-ba tsena li boletsoe ke Ofisiri Lefapheng la Tekano le Bobuelli ba Litokelo tsa Mantlha tsa Batho ba nang le Bokooa (LANFOD) Kopano Tšilonyana, puisanong le Koranta ka la 23 Mphalane monongoaha.

O re batho ba nang le bokooa ba se nkoe e le batho ba hlopheleng empa ba kenyeletsoe likarolong tsohle tsa sechaba molomong oa ntlafalo le bophelo bo botle, le litaba tsa boiketsetso tse etsetsoang

sechaba ba nkoe e le karolo molemong oa ho ikholla bofumeng etsoe e le batho ba tsebang ho iketsetsa mokhoa oa bophelo.

A re ho lokela ho be le lipheho tsa hore na batho ba nang le bokooa ba hiroa ho tloha boemong bofe ho ea

boemong bofe ka lipheho tsa lipalo-palo tse tataisoang ke molao hore ba be le boemeli liqetong tseo ba li etsetsoang. O re taba ena e tla ba karolo ea ntlafalo ea molao o kenyeletsang batho bohle kahar'a sechaba liqetong tse kholo le meseb-

etsing.

H'a joale o itse ba tobane le qholotso ea hore litaba tse ngata ba bona li fetohile kahar'a melao li bile li lieha ho phethahala, e leng se sitisang ntšetsopele le kholo ea bona litabeng tsa tsa- maiso. A re Naha ea Leso-

tho e boemong boo e tlamehang ho etsa tlama-thata ho sireletsa litokelo tsa batho ba nang le bokooa ho qoba har'a litaba tse ling bofuma bo ba tjametseng ka lebaka la ho nenoa le ho se ananeloe kahar'a sechaba.

A re ho bohlokoa hore naha e bone hore batho bohle ba natefelo ke litokelo tsa bona, le hoja ba nang le bokooa ba hlaloso ba le tlokotsing ea hore ba na le bobueleli empa bo fella boemong bo itseng ba liqeto.

O re melao e teng empa boholo e kenngoa tšebetsong le ho etsoa ho sa etsoa liphuputso e le karolo ea ho kenyeletsa litlhoko tsa batho ba nang le bokooa, ka hona ke takatso ea bona ho bona melao e teng e fetoloa e etsoa ho ipapisitsoe le litlhoko tsa batho ba nang le bokooa ho bontša hore le bona b'a ananeleha kahar'a sechaba.

Ho feta mona, o hlalositse hore Naha ea Lesotho e lokela ho kenya tšebetsong litumellano tsa machaba tseo e li tekenelang molomong oa hore litaba tsa batho ba nang le bokooa li ke li phamoleloe holimo. O itse ho fihlela ha joale 'Muso oa Lesotho kamor'a ho saloa morao ke Mokhatlo oa Lithuso Baneng ke hona o fanang ka tlaleho ea molao oa tšireletso ea batho ba nang le bokooa.

H'a phethela o itse litokelo tsa mantlha tsa batho ba nang le bokooa ke litokelo tseo mang le mang a nang le tsona ho fapakanang ke tlhokomelo le tsela ea katameloe.

E mong oa bacha ba nang le bokooa ba pono Lisebo Balopeli, o itse litokelo tsa mantlha tsa batho ba nang le bokooa li ntse li sa hlokomeloe ka ho nepahala kaha ba ntse ba khetholloa kahar'a mesebetsi nakong ea khiri, empa ba e-na le litsebo le boiphihlelo joaloka bacha ba bang. A re litaba tsa puo le metsamao e ntse e le bothata kahar'a naha hobane le litsela ha li lokisoa ha ho sebetsanoa le ntlafalo ea libaka tseo ba ka tsamaeang ho tsona.

O re taba ena ke khatikelo ea litokelo tsa bona e lokelang ho eloa hloko etsoe ba na le bolokolohi ba motsamao le ba ho fumana litšebeliso joalo ka Mosotho e mong le e mong. A re litokelo li lokela ho akaretso sechaba sohle eseng li khethe nku ka pere.



## India e tiisa maqhama le Lesotho

### Nthabeleng Seitlheko

Ka morero oa ho tiisa maqhama lipakeng tsa Lesotho le India, Mokhatlo oa Matsoalla a India Lesotho o ketekile lilemo tse 200 sechaba sa Basotho se ne se thoe. Litaba tsena li bile Holong ea Liboka ea 'Manthabiseng, ka la 20 Mphalane monongoaha.

Mookameli oa Mokhatlo oa Matsoalloa a Naha ea India Baju Abraham Korah, o

itse matsoalloa a naha ena a kopane 'moho le sechaba sa Basotho ho theha khotso le kopano e le karolo ea ho matlafatsa likamano tsa linaha tsena ka bobeli. O re hona ke sesupo sa hore likamano tsa linaha tsena tse peli li mofuthu kaha mesebetsi eo ba ipabolang ka eona e le ho kenya letsoho litabeng tsa bophelo bo botle ka ho romella lingaka kahar'a naha hape baithuti ba Lesotho ba fumana menyetla ea ho ithutela litaba tsa lithuto tsa mahlale le bongaka naheng ea habo bona.

O re har'a mesebetsi e meng e meholo eo ba atlehileng ho e fihlela ke ho koetlisa Sesole sa Lesotho (LDF), 'me ba ikemiselitse ho ntlafatsa thuto ea bana ba Basotho le ho koetlisa mafapha a fapakaneng ho kenyeletsa le Sepolesa sa Lesotho (LMPS).

Moemeli oa Naha ea India Lesotho Prabhat Kumar, o re ba tšoare ka thata ho bona hore ba kenya letsoho ntlafalong ea bophelo ba Basotho, haholo thuto molemong oa tsoelpele ea naha. A re ha ba batle ho bona eng kapa eng e

ka thunthetsang maqhama a linaha tsena tse peli molemong oa hore tšebeliso 'moho ena e mofuthu e thuse kholisong ea moruo oa linaha ka bobeli.

O itse ba etela libaka tse fapakaneng ho bona hore Basotho metseng ba fumana litšebeliso tsa bophelo le ho tšehetsa malapa a tjametsoeng ke bofuma ka lijo. A re bophelo kamor'a seoa sa COVID-19 bo fetohile 'me moruo oa linaha o amehile, ka lebaka leo ba ikemiselitse ka hohle ho thusa kholisong ea moruo oa naha.

Letona la Bohahlauli, Mohlomphehi Motlatsi Maqelepo, o hlalositse hore Naha ea India e bile le seabo se seholo kholisong le ntlafalong ea Lesotho. A re ketekelo ea lilemo tse 200 sechaba sa Basotho se thehiloe ke ntho e kholo e bolelang boikemelo, boitsebo le sechaba se bopang likamano tse mofuthu le tse ling. A re ha joale Basotho ba atleha ho leba Naheng ea India ho ntlafatsa lithuto tsa bona, 'me hona ho bontša kopano ea merabe.

A re a mang a matsoalloa a Naha ea India a na le nako e telele a phela naheng ena ka khotso, ka hona ba lakatsa khotso ea moshoelella lipakeng tsa linaha tsena.





# Likhohlano mabapi le Sehlopha sa Bosupa

## Nthabeleng Seithleko

Raliphatlatso oa Mokhatlo oa Baakameli ba Likolo (LES-PA) 'Matšoanelo Lichaba, o re ba ema khahlanong le polelo ea Lekala la Thuto le Koetliso ea ho sa koale likolo ha baithuti ba Sehlopha sa Bosupa, ka le reng ho hatikela litokelo tsa baithuti, batsoali, litichere kaha e le morero oo lekala le o etsang le sa natse ho atamela bohle ba amehang. O boletse tsena puisonong le Koranta, ka la 23 Mphalane monongoaha.

O hlalositse hore moithuti o na le mokhahlelo oo ka ona a lokelang ho hlahlojoa, ka hoo ba makaletse taba ena ebile ha ba lumellane le eona, hobane ngoana o rutoa ka mekhahlelo hape o ngola ka eona ka hona kamor'a hlahlobo ena ea ho qetela ha ba tsebe ba tlo ruta'ng, kaha ho se seo lekala le se hlophileng bakeng sa barutoana bao.

A re baakameli ba Likolo tsa Mathomo ba seboko ka hore baithuti ba ile ba ikoalisale selemong sa 2023 kaha e

le lekhetlo la bobeli lekala le etsa taba ena e sa ba tsoeleng molemo. A re ho imetsoa batsoali ka litšenyehelo, hape e t'lo ama litichere tse rutang Sehlopheng sa Bosupa kaha bohlo ba il'oa tšoea baithuti ba lihlahlobo tsa ho qetela 'me bana ba tlo sala ba le bang ka lihlopheng le ho bakela likolo tšubuhlellano ka lebaka la ho hloka moralo.

H'a phethela o itse ba se ba kopile kopano le Lekala la Thuto le Koetliso kaha le sa ele hloko maikutlo a bona. A re taba ena e na le litlamorao joaloka bana ba t'lo nyolosa ba theosa sekolong, qetellong e-ba bokhachane hobane ba bonahala ba se ntse ba qalile ho etsa thobalano ba le banyenyane ka hoo hona ho t'lo ba fa monyetla kaha ho se tsela e hlakileng eo ba lokelang ho sebetsana le eona.

Leha litichere tse 'maloa li ile tsa bontša li tobana le phepetso ea baithuti ba fetelang Sehlopheng sa Borobeli ba sa tsebe ho bala le ho ngola, Lekala la Thuto le Koetliso le arabetse selo sena ka ho phatlatlatsa hore baithuti ba phethelang



Sehlopha sa Bosupa ba se be le nako ea phomolo kamor'a ho ngola lihlahlobo tsa mapomelo.

Letona Lekaleng la Thuto le Koetliso Prof. Ntoi Rapa, o supile hore barutoana ba Sehlopha sa Bosupa ba tla tsoelapele ho ea sekolong leha ba se ba pheth-

itse lihlahlobo tsa mapomelo, e le hore litichere li tsebe ho ithuta moo bofokoli ba baithuti bo bileng teng, ba tsebe ho ba thusa.

O re hona ho tla felisa selo sa nako e telele sa litichere tsa Sehlopha sa Borobeli sa hore lenane-thuto lena le thefutse mokhoa oo

barutoana ba neng ba rutoa ka ona, kaha bana ba ne ba bonahala ba fetela sehlopheng seo ba sa tsebe letho ka le reng ba fetisoa feela. A re hona ho tla matlafatsa taba ea hore baithuti ba ee pele ba utloisisa lithuto le litichere tsa Sehlopha sa Borobeli li ithophile hantle.

## Nthabeleng Seithleko

E le ho matlafatsa thuto e kenyeletsang batho bohle le ho ntlafatsa boikemelo ba bacha likolong tse bohareng, Lekala la Thuto le Koetliso ka mafapha a nang le seabo litabeng tsa thuto le tšohlile leano le ntlafatsang sethala sa kopano ea bacha likolong. Litaba tsena li boletsoe ke Ofisiri ea Litaba tsa Bophelo bo botle ba Barutoana 'Makhotso Lekhetso, ka la 22 Mphalane monongoaha.

O bontšitse hore ba t'lo hlahloba litaba tse ileng tsa fumanoa nakong ea liphuputso hore baithuto ba fihleloa joang molemong oa hore bohle ba ikutloe ba phutholohile le ho arabela lithoko tsa moithuti ka mong haholo boemong boo ba buang le baithuti 'moho hape le ho fihlela tharollo ea mathata ao ba tobanang le ona malapeng kapa likolong. O itse litokomane tsena li tla bolokoa e le tsa boleng tse tla thusa ho inola

## Lekala le theha sethala sa lipuisano



thuto ea Lesotho.

Mookameli oa Thuto e lkhethang 'Mapaballo Setlaba, o hlalositse hore barutoana ba nang le bokooa ba na le liqholotso ho feta ba bang ka hona mohato ona o tla atleha ho theha sethala seo ba tla lokoloha

ho lithaka 'moho le bona. A re ba tla tseba ho ntša maikutlo a bona ka ho ba le lipuisano le bacha ba bang e le hore lithoko tsa bona li arabeloe.

E mong oa litichere tsa thuto ea Life Skills Mpho Ntuba, o hlalositse hore ba

rata ho bona baithuti ba hola ba e-na le boikemelo ba bile ba tseba ho buisana molemong oa hore ba atlehe ho iphumana joaloka bacha bohle. A re sebaka sa sethala sa lipuisano sa bacha likolong se tla thusa khokahano lipakeng tsa baithuti le ntlafalo ea bona molemong oa tsoelopele le kholo ea bokamoso ba baithuti ba tsebang ho aha litaba tsa khotso, ba utloisisa le tlhokomelano le ho amohelana ka maemo a bona likolong.

A supa hore bana ba lokela ho hola ba utloisisa boikemelo le litokelo tsa bona, ka hoo morero oa thuto ena ha se ho fetola tsela ea khohiso ea bana empa e le ho ba matlafatsa molemong oa kholo le ntlafalo ea bona.

Mosuo-e-Hlooho oa Sekolo se Phahameng sa Mt. Moorosi Quthing, 'Matlopo Mafantiri, puisonong le Koranta o hlalositse hore baithuti ba bonahala ba tobane le phepetso e kholo boikemong ba bona le ho iphumana e le mahlatsipa a litaba tsa bophelo tse

amang maikutlo a bona joaloka liqabang malapeng, tla le bofuma tse tjametseng malapa. O re thuto ea Life Skills e t'lo thusa likolo ho matlafatsa baithuti bophelong ba bona.

O re Lekala la Thuto le Koetliso le matlafatse thuto ea bana ka ho theha lithala tse hlophisehileng tsa baithuti li bile li tšehelitsoe ka molao hore baithuti ba ananelane, ho atolosa mehato ea khotso likolong le bolokolohi ba baithuti ho ba bang e le hore likolong baithuti ba tsebe ho mamelana ho latela lithoko tsa bona, hape le ho nolofatsa lipuisano lipakeng tsa litichere le batsoali.

'Moka ona o tla kamor'a boithuto bo ileng ba etsoa likolong tse 19 naha ka bophara tlasa sekhele sa 'Mantsopa o behang bacha boemong ba ho ntša maikutlo litabeng tse ba amang tsa bophelo le ho thusana molemong oa ho fihlela lithoko tsa moithuti ka mong ho shebiloe boikemelo, kholo le ntlafalo ea hae.









# TSA KEREKE

## Maphala o phomotse

### Tseliso Thakholi

**M**ofu Bro. Tiisetso John Maphala OMI o phomolitsoe borokong ba hae ba ho qetela, Setšeng sa Bafu sa Maoblata, Mazenod ka la 19 Mphalane monongoaha. Litšebeliso li ne li eteletsoe pele ke Mobishopo oa Tikoloho ea Qacha's Nek Mohlompheli Mopeli Joseph Sephamola OMI a tlatsitsoe

rialo. A re lintho tseo re nahang hore ke mathata ke tseo ka tsona Morena Molimo a batlang ho bona hore na re matla ha kae.

H'a hlalosa tsa bokulo ba mofu, Bro. Leonard Libe OMI o itse mofu o kutse nako e telele a ntse a tsamaea, empa ho tloha ka 'Mesa monongoaha o ile a bonahala bophelo ba hae bo ntse bo mpefala. A re o ne a khathatsoa ke ho ruha ha mpa, 'me o ile a

Morena Molimo ho phela bophelo ba ho ba Le-Oblata. A re ba phetse le eena 'me ba tseba matla le bofokoli ba hae, ka hona a ba kopa hore ba mo rapelle hore Morena a mo tsoarele moo a ileng a ba siteloa le eena a ba tsoarele ha ba ntse ba hatana litorong nakong eo ba neng ba pheliana le eena.

Haele Mobishopo Joseph Sephamola OMI h'a bua lebetsong la Seboka sa Ba-



ke baprista le badiakone.

H'a fana ka khotatso Fr. Augustinus Lebofa o itse hoja bophelo ba Bro. John bo ne bo ka ngoloha, 'me ra ithuta ka bona bohle re ne re tla tseliseha, ho itlahlaba le ho phela ka tsela e 'ngoe e ncha. "Bro John uena u tsoile litsietsing tsa lefatše lena. O phethile thomo ea hau u se u ea mane motseng o motle, motseng oa phomolo. Lelapa le Kopano ea Maoblata le metsoalle ba re ho uena, re bohloko re lla meokho ka lefu la hau. Molimo o re amohile uena, empa thato ho entsoe ea hae." A

potlakisetsoa Sepetlele sa Sephotso sa Mofumahali 'Mamohato makhetlo a mabeli ho fumana kalafo. A re ke mona moo lingaka li ileng tsa fumana hore ka mpeng ho eena ho tletse metsi a mangata le lipheo li se li sa sebetse hantle. Ke ha ka la 4 Mphalane morena a mo biletsa ho Eena.

Ea buileng lebetsong la Likopano tsa Baitlami Sr. Jesenta Rantšo o itse Bro. Maphala o phetse Misteri ena e motho, ho fihlela qetellong ea bophelo ba hae a ntse a le moo a neng a khethetsoe ka thato ea

bishopo Lesotho (LCBC) ka bokhutšoanyane, o ile a fetisa matšelisano ho Kopano ea Maoblata le ho lelapa le ileng la fana ka mora oa lona Kerekeng le Kopanong ea Maoblata. A tselisa bohle, 'me a qetella ka ho thoholetsa Bro. Maphala ka ho ba le makhabane a ho tseba ho sebetse 'moho le batho bohle le ho ratoa ke batho.

Ramaoblata Fr. Sydney Boatile OMI o ile a isa liteboho tsa hae ho bohle ba ba tšehelitseng ka litsela tse fapakaneng nakong ena eo ba oeleng ka phatla.



## 2023-2024 SELEMO B

### SONTAHA SA 30 HAR'A SELEMO

Isaia 53,10-11

Pesalema 32

Ba-Heberu 4,14-16

Mareka 10,35-45



### Khotatso

## Moruti e re ke bone hape

Polelo ee ea monn'a sefoku e bolela'ng? Ana ke bofoku ba nama kapa ba moea? Le hoja pono ea nama e lakatseha hakaalo, empa ea moea eona ea hloka hloka molemong oa pholoho.

Thutong ea Pele le utloa ka palo e nyenyane ea batho ba ileng ba pholoha bokhoba ba Syria ka selemo sa 721 BC, 'me ka lebaka la ho hloekisoa ka kholeho eo ea bona ke Israele e ncha, e tšepahallang Morena. Ka ho feta litlhokofatsong sechaba se ile sa ikokobetsa 'me sa khutlela ho Morena ka tšokoloho ea 'nete. Qalong leha ba ne ba bona mahlong, moeeng teng ba ne ba fufetse empa bokhoba bo ile ba ba bula mahlo a moea. Sechaba se ile sa bina ka mantsoe a phefa ka thabo eohle ho leboha Morena h'a lopolotse ba fokolang, ba nang le bana le ba pelehing.

Thuto ea Bobeli e ruta hore moprista e moholo o khethoa kahar'a ba fokolang 'me o sebeletsa Morena, ka hona ka lebaka la botho ba hae o lokela ho etsa lihlabelo. Mosebetsi oo a o etsang ha se khetho ea hae kapa ea motho, empa ke pitso ea Morena joalokaha Aaron e ne a bitsitsoe ke Morena Molimo. Morena Jesu le hoja e ne e le Molimo ka sebopeho sa motho h'a ka iphahamisa ho iketsa moprista e moholo. Molimo Ntate ke eena ea ileng a mo phahamisa ka mantsoe ana, "U Mor'a oa ka, ke u tsoetse."

Motho ea nang le pono ea moea o bua khahlanong le limpe tsohle tsa lefatše lena, le tsohle tse khahlanong le Kereke. Ka ho chesehela pholoho ea bana ba habo, o supa liphoso tsohle tse loantsang Thuto ea Kereke e Katholike. Ha ho le ka mohla a mathang kamor'a thuto e fosahetseng, hobane'ng? Hobane tseo tsohle kaofela li silifatsa moea, li kenya pelaelo kelellong ebe qetellong li silafatsa pelo ea hae.

Pono ea moea ha e bonahale feela khethong kapa pehong ea baprista, empa liketsong tseo motho a li etsang letsatsi le letsatsi. E boetse e itšetlehile kholong ea moea e le ho netefatsa hore thuto eo motho a ithutileng eona e utloahala le ho tsitsa joaloka ntlo e ahiloeng methehong e matla.

Bekeng ena ha re hlahlobeng maemo a rona malebana le Kereke; hore na re phela ho latela ka moo Makatholike a lokelang ho phela kateng. Ebe re ananela thuto e fosahetseng 'me a beha tumelo ea rona tsietseng? Pono ea rona ea moea e timetse?

Ha re rapelleng bohle ba fufetseng moeeng hore Lentsoe la Molimo kajeno le ame lipelo tsa bona e le hore ba fumane matla ho Kriste, 'me furalle tsohle tse behang tumelo ea bona tsietseng kapa hona ho e senya. Kaofela ha rona ha re kopaneng ho rapela grasias ea Morena ho khanya ho bohle ba e hloka, ho ba bula mahlo kamehla le mehla.

## Bahalaleli har'a Beke

- 28 Mphalane Jude Thaddaeus
- 29 Mphalane Hyacinth
- 30 Mphalane Alphonsus Rodriguez
- 31 Mphalane Bega
- 01 Pulungoana Licinius
- 02 Pulungoana Theodotus



# Se ipatla boemong ba pele



fumana monyetla oa ho neheletsana libolo ho ea pele.

A re morero o moholo oa bona ke hore ha mokhahlelo oa pele oa Liki o fihla pheletsong ba batla ho iphumana ba le tlhorong ea liki, 'me ha selemo se fela ba be ba e hapile ba kena lihlopheng tse kholo. "Thomo ea ka ea mantlha ke hore feela sehlopha se kene liking e kholo ke phetho." O boletse joalo.

E re kaha papaling ea bolo ea maoto ho etsahala mehlolo, o ile a makala haholo ha sebakali sa hae se fua karete e khubelu



ka mokhoa oa mohlolo kaha a re ho ea ka kutloisiso ea hae ho ne ho sa lokela hore ebe a ka e fua. "Ketsahalo ena e ile ea nthefula maikutlo haholo, hoo e ileng ea batla e ntlahisa mehopollo." A rialo.

Eitse a sa makaletse boemo bona Members e ile ea fua lipenele tse peli, tseo le tsona a tiisitseng hore e ne e se tsona. "Ke re ha ke re ba re ke bone hantle hore e ne e se tsona. Empa ha ke tsebe hore na nako e 'ngoe batsamaisi ba rona ba lipapali ba tla ba itokisitse joang ho tsamaisa lipapali hoba ho tloha h'a qala feela o hlile a fa sebakali sa ka karete e tšehla." O boletse joalo

a bile a phethela ka hore o ne a se a ntse a hlokomeletse libapali tsa hae hore li se kena-kenane le liqeto tse tla etsoa ke batsamaisi ba papali, kaha seo se ka ba beha ka moo thaka e fatelang. A thoholetsa le ho lebohela libapali tsa hae ka moo li bapetseng ka boitelo le ka makhethe ka teng.

Athe haele lihlopha tse ling tse bapetseng ke moo Qoaling Highlanders e ileng ea hlola Swallows ka 1-0, Mahlaseli ea teteka 05 united ka 3-1, Litšilo ea shapa CCX 3-0, Maroala ea paputla Sehenehene 3-0. Haele lihlopha tsa mapolesa a Quthing le Qacha's Nek tsa pitikisa mahe.

## Tšeliso Thakholi

**K**amora ho hlohlora Members ka thupa e bohloko ea 2-1, papaling ea leoto la pele la Liki e Kholo e neng e tloa lithase, Lebaleng la Swallows, Mazenod ka la 20 Mphalane 2024, Sehlopha sa Bolo ea Maoto sa FC Summit se nyolohetse boemong ba boraro lokong, 'me se laba-labela ho ba boemong ba pele ha liki e fihla pheletsong.

Kamora papali ena, Mokoetlisi oa FC Summit Monghali Pusetso Mohapi o itse kaha ba ne ba tseba hore Members e

kotsi haholo ha e rahela libolo pele, ba ile ba hla ba eketsa lipalo tsa bona ho thibela hore e se ke ea



# E fetoha mokopa-kopa

## Tšeliso Thakholi

**T**lhokahalo ea mabala a boemo ba machaba kahare ho Naha ea Lesotho e hlaloso ke barati ba lipapali, e le ea tse ling tsa lintho tse hloksang naha ho tsoela pele lipapaling. Ba hlalosa ho se ka mokhoa oo Basotho ba ka thahasellang ho ea mabaleng kapa hona ho ithukhubetsa lipapaling, empa ho se mabala a bo leng bo botle naha ka bo phara.

Monghali Khabele Raliengoane e le e mong oa barati

ba lipapali o hlalositse puisanong le Koranta hore lipapali li ratoa haholo ke Basotho, empa ha ho mohla ba ikarabellang ntšetso peleng ea lipapali ba sekehelang tsebe likopo tsa bona tsa hore mabala a ahoe Lesotho le hore le lehlo la Setsoto le behoe maemong a machaba, e le hore LeFA e se ke ea iphetola mokopa-kopa ka ho ea qelisa bapala linaheng tse ling.

"Re na le Lebala la Setsoto e le lona feela le lehlo, empa le koetsoe ka lebaka la maemo a lona a sithabetsang pelo. Re kena



litšenyehelong tse boima ha re lokela ho ea tšehetsa sehlopha sa rona sa naha. Ke neng 'muso o tla ke o utloe sello sa rona? Le ho ba le kutloisiso ea hore lipapali ke mosebetsi haesale boithapallo joaloka pele?"

A re na haele mona Lebala la Setsoto le le Maseru feela, na ke mekhoe efe e ka etsoang hore mabala a boemo ba lona a ke a be teng literekeng tse ling tse kang tsa Mohale's Hoek, Thaba-Tseka, Qacha's Nek le Mokhotlong?

Mofumahali 'Masempe Sempe eena a re na ha ba tšoereng marapo 'musong ba na le ho ikema ka hore bacha ba nene liketso tse mpe ka ho ea lipapaling, ba ee lipapaling ha mabala a le hokae. A re ha ho mohla bacha ba tla nena tai le matekoane ha feela mabala a boemo ba machaba a ntse a le sio kahare ho naha. "Muso o se o hloloa le ho lokisa lebala le le leng feela la Setsoto?" Ho botsa Sempe a bile a eketsa ka hore "se bohloko ke hore batho

ba ikarabellang lipapaling ba lula ba tsamaile ba ile maetong a lipapali linaheng tse ling. Ebe ha ba sa khahloa leha ba bona lintho tse ntle linaheng tse ling?"

A hlalosa hore naha ea boahelani e kang Afrika Boroa e na le mabala a phethahetseng liprofenseng tse robong tsa eona, hoo Lesotho le seng le bile le iphetotse mokopa-kopa oa eona. A ipiletsa ho ba ikarabellang hore Lebala la Setsoto le loke, e seng ka mekete ea boipuso feela.





# Ba tsoelapele ho ipabola



ea 1-0, ha Eswatini e makalitse batho ba bangata lipapaling tse na ka ho teteke ntle le qenehelo Seychelles ka phafa ea 6-0. Lintlha tse tharo tsa Eswatini li hlabiloe ke Tenanile Ngcamphalala, Celiwe Nkambule a hlabisa tse peli, ha ea ho qetela e hlabiloe ke Tshagofatso Motlogelwa.

Lipapali tse na li ntse li bapalloa mabaleng a Gelvandale Stadium le Isaac Wolfson Stadium kamora hore lipula tse matla tse ileng tsa tšoloha, li bake tšenyō e tšabehang Lebaleng la Nelson Mandela Bay moo li neng li lokela ho ea bapalla teng. Ho feta

mona lipapali tsa la 23 ho isa la 25 Mphalane li se li tla

la-khang le makhaola-khang li tla bapalloa Isaac Wolfson



bapalloa Isaac Wolfson Stadium, ha tsa la 26 ho isa la 29 Mphalane li tla bapalloa Lebaleng la Junifesithi ea Nelson Mandela la Madibaz Stadium. Haele lipapali tsa ho qetela tsa seka-makhaola-

Stadium. Lesotho le tliho bapala papali ea lona ea pele ea litlholisano tsa COSAFA Women's Champions ka la 27 Mphalane khahlanong le Zimbabwe.

## Tšeliso Thakholi

**B**aletsaphala ba Mokhatlo o Tsamaisang Bolo ea Maoto Lesotho (LeFA), ba ntseng ba tsoelapele ho ipabola mosebetsing oa bona oa boletsaphala e leng Polotso Maapara le Nteboheleng Setoko ba khethetsoe ho tsamaisa papali tse peli tsa Mohope oa Women's COSAFA Champion tse simollang lipapali tse na tse ntseng li tsoela pele Gq-eberha Naheng ea Afrika Boroa.

Setoko ea neng a sa tsoa ipabola ka ho tsamaisa papali ea CAF-COSAFA ka makhethe a maholo o fue boikarabello ba ho tsamaisa sehlopha sa Mokhahlelo oa B sa Malawi seo e leng sona se sireletsang mohope ona, ha se tla be se koebana le Botswana. Athe Polotso Maapara o tla be a sebetsa e le mothusi oa moletsaphala papaling e tlang ho ba lipakeng tsa Afrika Boroa le Namibia.

Bobeli bona bo tla be bo le tlasa leihlo le nchocho la Morupeli oa baletsaphala Mofumahali Selloane Mphuthing. Ho sa le joalo lipapaling tsa pele tse neng li bula litlholisano, Afrika Boroa e tsoile ka lesoba la nale ha e ne e shashara Namibia ka thupa e bohloko



REGION V WOMEN'S DEVELOPMENT LEAGUE TABLE  
19/10/2024

P	TEAM	P	W	D	L	GF	GA	GD	Pts.
1	Peace Makers Ladies	2	2	0	0	4	1	3	6
2	Ladybugs United Football Academy	2	1	0	1	3	2	1	3
3	Rural Stars Girls	1	1	0	0	2	1	1	3
4	Juventus Ladies	3	1	0	2	4	4	0	3
5	Lifeti Ladies	2	0	0	2	0	5	-5	0

# Boikoetliso ke bophelo

## Tšeliso Thakholi

**M**okoetlisi oa S e h l o p h a se secha sa Higher-life Physical Aerobics Club (PAC) Mofumahali 'Malimpho Maqalika o ipilelitse ho banana, basali le maqheku ho ikoetlisa, bakeng sa bophelo bo botle "etsoe boikoetliso ke bophelo." O entse boipiletso bona nakong eo a neng a buisana le Koranta Mazenod ka la 20 Mphalane 2024.

"Ha joale batho ba lokela ho phela ka boikoetliso hoba leha ba ile lingakeng ba kula ba khothaletsoa ho ikoetlisa ka mekhoha le litsela tse fapakaneng." Ke eena eo. A re boikoetliso bo ka thusa motho bakeng sa ho theola

'mele kapa ho shahla hantle a khatholohile 'meleng le kelelong. A re e kholo ka ho fetisisa boikoetliso bo theola khatello ea maikutlo.

A supa hore ke taba-tabelo ea hae ho bona bafani ba kenya letsoho ho holisa le ho ntlafatsa lihlopha tsa papali ea Aerobics tsa batho ba baholo le ba banyenyane kaha e kenyeletsa le litaba tsa bophelo bo botle. A re ba hloka tšebetso ea lichelete ho bona hore papali ena ea hola kahare ho naha. "Re lula re tsamaea re etela literekeng ho fana ka thuto mabapi le bohlokoa ba boikoetliso, ka lichelete tsa rona molemong oa bophelo bo botle ba sechaba." A rialo a bile a tiisa hore lithuso b'a li hloka leha ba lula ba sa li fumane kamehla.

A kopa bafani le Lekala

la Lipapali ho ba ela hloko hore Sehlopha sa Life Physical Aerobics Club se teng kahare ho Naha ea Lesotho ho potoloha le litereke ho khothaletsa maqheku, basali le banana ho lula ba phetse hantle ka ho ikoetlisa ka linako tsohle. Potsong ea hore na sehlopha sa bona se shebane le basali feela kapa le banna le bona ba khothaletsoa boikoetliso?

O itse banna ba amohetsoe ka liatla tse peli, etsoe libakeng tse ling lihlopha tsa Aerobics li thehiloe ka banna le basali, empa ba rerile ho tsosolosa basali haholo kaha banna ba se ba ntse ba le matla haholo bakeng sa boikoetliso. "Hape basali ke bona ba khathatsoang ke mafu a pelo le khatello ea maikutlo ka malapeng. Re leka hore b'a loantše ka pa-

pali ena ea Aerobics ba sa sebelise lithlare." O boletse joalo.

A supa hore bekeng ea ho feta ba ne ba etetse Seter-ekeng sa Mohale's Hoek, 'me ba kopana le lihlopha tse tharo tsa metse ea Qalakheng le Motse-Mocha litlholisanong tsa lihlopha tse tšeletseng moo tse peli li neng li kopantse banna le basali ha se le seng e ne e le sa banna. A supa hore morero o mong oa bona ke etela linaha ka ho fapakaneng tse kenyeletsang Botswana, Afrika Boroa le Eswatini ho ea nka malebela le ho theha maqhama a setsoalle le tsona. A re e se e ka ba ka fumana tšebetso e le ho phetha e meng ea meralo ea bona ea ho matlafatsa le ho anetsa papali ena pele selemo sena se kolumela.



# Sepolesa se hlapa matsoho

## Nthabeleng Seithheko

P hala ea Sepolesa sa Lesotho (LMPS) Senior Sup. Mpiti Mopeli o hlalositse hore sepolesa ha se'a utsoa chelete ea Mokha oa Lipolotiki oa BEE 'mokeng oa bo-ralitaba oa la 23 Mphalane monongoaha.

O itse ka khoeli ea 'Mesa ngoahola bahatsa ba baetapele ba mekha ea BEE le BDC 'Matlali Soro (45) le 'Makopanang Mohatle (38) 'moho le Mongoli-Kakaretso oa BEE Thetso Kabi (27) oa Khubetsoana ba ile ba ea Ha Tikoe ho ea lefa baemeli ba mekha eo

kamor'a likhetho. Eaba ho fihleng ha bona ba qabana le balefuoa kaha ba ne ba lebeletse chelete e kaalo ka M300.00 empa bao ba ba tšepisa e kaalo ka M150.00. Ka ho elelloa ho se khotsofale ha bona balefi ba ba tšepisa eona eo ba neng ba e lebetse 'me ba re ba tla ea Komising e Ikemetseng ea Likhetho (IEC) ho fumana tlhaloso.

A re kamor'a ho ba lefa chelete ba ile ba re bao ba tekene pampiring 'me ho tloha moo ba leba mapoleseng ho ea tlaheha hore batho bao ba hlahang pampiring moo ba ba nketse chelete ka mahahapa.

"Ke moo sepolesa se ileng sa sala litaba tseo morao ho

etsa liphuputso, 'me tsona tsa sibolla hore batho bao ha se 'nete ha ba ikhaphela chelete empa tlaheho ea bona ke ea lefofo." A rialo.

A re basali bao ba babeli le monna eo ba ile ba tšoaroa ba qosoa ka tlaheho ea lefofo ka ho tloa Molao oa 74 oa 2010 ka ho tlaheha seo e seng sona. O itse ke ho tloha hona moo sepolesa se ileng sa tsoa letšolo la ho ea batla hore na chelete e 'ngoe e hokae?

O re sepolesa se ile sa fumana chelete e kaalo ka M15,000.00 Ofising ea BDC le e kaholimo ho M90,000.00 ha 'Makopanang Maseru East. A re tlaheho e bontša hore chelete eo kaofela e ile ea khutlisetsoa IEC, kamor'a ho khotlaetsa hore e khutlele teng ha sepolesa se ntse se etsa liphuputso.

"Banna ba babeli bao e leng baetapele ba mekha ea lipolotiki, ha ba utloa hore mapolesa a tšoare basali ba bona, ba ile ba ea sepoleseng empa ha ba hlokomela hore ba fasitsoe ka mahlaahlela ba tšola tlhako morong." Ke Mopeli eo.

A re Sepolesa ha se na molato ho nyameleng ha chelete, 'me se ntse se fuputsa taba e hlileng e etsahetseng ketsong ena, kaha moetapele oa BEE Mohatle a ntse a neta sepolesa ka leshano.

Litaba tsena li latela hore Moetapele oa BEE Litaba Mohatle, a ntše phat-



lalatso ea litaba ka la 15 Mphalane monongoaha, moo a neng a kopa thuso ho baphatlalatsi ho phatlalatsa sechaba haholo batho bao e neng e le baemeli ba mokha nakong ea likhetho tsa la 22 Mphalane 2022 mabapi le meputso ea bona ea tšebetso, hore ho ileng hoa tumisoa ke sepolesa hore mofumahali oa hae le ba neng ba tsamaea le eena ba utsoitse chelete ha se 'nete.

O re bonnete ba taba ke hore chelete e joalo e utsoitse ke ona mapolesa lapeng ha hae, ka la 06 'Mesa 2023 motšoare moo a ileng a khakhatha le ho fasa mofumahali oa hae le ba neng ba tsamaea le eena ka liketane maoto le matsoho.

A re e se e le nako ho feta selemo joale ba bile ba lata sa bobeli 'me eena joaloka monna oa Mosotho o lumela hore moo likhang li leng

teng, makhotla ke ona a tla aba toka ka hona o sitoa ho kena-kenana le litaba tse seng li le ka makhotleng.

O itse nyeoe ena e tekoe ke mapolesa Lekhotleng la 'Maseterata Maseru boteng ba boemeli ba IEC ka la 11 'Mesa 2023 kamora ho boloka mofumahali oa hae le ba neng ba e-na le eena matsatsi a tšeletseng ba sa je, 'me tebello e ne e le ea hore e tla ba likhang li se li tšohluoe empa chelete eo e se e phethile mabaka ao e neng a e retetsoe ke beng ba eona.

"Ka bomalimabe, mapolesa a bonahala a se a se na thahasello ea ho fumana 'nete ea taba ea hore bona ha ba utsoa chelete empa joale beng ba chelete ba bolaoa ke tlala, ho touta le ho kena kahara mekitlane ka tšepo ea hore chelete ea bona e tla khutla." Ke Mohatle eo.



## Tšeliso Thakholi

# E khutlisetsa sechabeng

B anka ea Standard Lesotho e nehelane ka mpho ea mekotla e 100 ea lijo tsa likhoho le likhoho tsa mahe tse 300 tsa boleng ba chelete e kaalo ka M66,740.00, ho Lehae la Bana ba Likhutsana la St. Cecilia, tšebeletsong e bileng St. Cecilia, Ha Bua-sona ka la 21 Mphalane 2024.

H'a bua tšebeletsong ena Letona la Lekala Tekano, Bacha le Ntšetsopele ea Sechaba, Mohlomphehi Pitso Lesaona o itse lekala la habo le na le mafapha a fapakaneng a tšireletso ea bana a kenyeletsang hara a mang Lefapha la Tšireletso ea Bana le la Thuso ea Sechaba e leng ona a fanang ka tšireletso le tataiso molemong oa boiketlo ba bana.

A re Lekala le boitse le fana ka tlhokomelo ea bana ba hlokang ho holisoa le ho hokahanya mafapha ohle a sebetsanang le litaba tsa bana. A re Lehae la St. Cecilia ke le leng la mahae ao ba nang le selekane sa ho etsa mosebetsi oa ho holisa le ho hlokomela bana. A leboha Banka ea Standard Lesotho ka mosebetsi o motle oo eo e ntseng, ea ho fana ka mpho ena. A tiisa hore taba ena e bohlokoa haholo kaha banka e boitse e thusa bana hore ba tle ba tsebe ho itšoarela ka matsoho kaha likhoho tsena li tliil'o hlokomeloa ke bona.

Lebitsong la Standard Lesotho Bank, Mookameli Lefapheng la Lipoloko tsa Motho ka mong, Monghali Teboho Sello o boletse hore e 'ngoe ea boikarabello ba

bona ke ho bona hore ba khutlisetsa sechabeng le ho bona hore Basotho ba tsoelapele le ho ikutloa monate oa hore Lesotho ke lehae la habo bona. A re ba boitse ba nka e le boikarabello ba bona ho bona hore Basotho ba atleha bophelong ba bona ba letsatsi ka leng. "Ha re banka feela e isang litšebeliso sechabeng, empa re boitse re lokela ho bona hore naha ena ea habo rona le Basotho ba atleha." Ke eena eo

'Musi oa Setereke sa Berea, Monghali Phafane Maketa o thoholelitse le ho leboha Lehae la St. Cecilia ka tšebetso ea lona e ntle ea ho baballa le ho sireletsa bophelo ba bana. A re ke setšabelo le tšepo ea bona ha ho le thata Berea hobane ke lona le jereng setereke. A

leboha banka ka mosebetsi oa eona o tsoileng matsoho.

Mohlakomeli oa Lehae la St. Cecilia Fr. Augustinus Mahlaku o lebohile ka tselo e khetheleng banka ka tšebetso eo ba faneng ka eona ea likhoho tsa mahe.

A re tšebetso e kholo eo a e hlokang ke ea ho thusoa hore lehae le tsebe ho itlahisetsa lijo ka mokhoa oa temo. A tiisa hore sena se tla thusa hore le tsebe ho phela nako e telele le sa hloke lijo.

